

INFORMACIJA
o kretanju makroekonomskih pokazatelja
za januar/siječanj - april/travanj 2025. godine

Sadržaj

Uvod.....	3
1. Realni sektor.....	6
<i>Kretanje industrijske proizvodnje.....</i>	6
<i>Maloprodaja.....</i>	8
<i>Građevinarstvo.....</i>	9
<i>Tržište rada.....</i>	10
2. Javne finansije.....	12
<i>Indirektni porezi</i>	12
<i>Direktni porezi, doprinosi i neporeski prihodi</i>	14
3. Cijene, monetarni i finansijski sektor.....	16
<i>Cijene.....</i>	16
<i>Monetarni sektor.....</i>	17
<i>Bankarski sektor.....</i>	18
<i>Berze u Bosni i Hercegovini.....</i>	18
4. Vanjski sektor.....	20
<i>Vanjskotrgovinska robna razmjena.....</i>	20
5. Strana direktna ulaganja.....	22

Uvod

Vijeće ministara Bosne i Hercegovine je na 79. sjednici održanoj 05.03.2009. godine razmotrilo i usvojilo Prijedlog mjera iz nadležnosti Vijeća ministara Bosne i Hercegovine za ublažavanje uticaja globalne ekonomske krize na privredu Bosne i Hercegovine. Direkcija za ekonomsko planiranje je zadužena da u vezi sa navedenim prati kretanje makroekonomskih pokazatelja i da izvještaj o kretanju mjesečno dostavlja Vijeću ministara.


Direkcija je zadužena da „Informaciju“ dostavlja mjesečno Parlamentarnoj skupštini Bosne i Hercegovine u svrhu praćenja uticaja svjetske ekonomske krize na ekonomiju Bosne i Hercegovine.

„Informacija“ obuhvata kretanje glavnih makroekonomskih pokazatelja u Bosni i Hercegovini za navedeni period. Detaljna pojašnjenja svih oblasti koje su obuhvaćene u ovom dokumentu se mogu naći u Ekonomskim trendovima Bosne i Hercegovine koje publikuje Direkcija, kvartalno - četiri puta godišnje, te redovno dostavlja Vijeću ministara i Parlamentu Bosne i Hercegovine.

* * *

U ovom dokumentu biće prikazani podaci za nivo Bosne i Hercegovine i entitetske nivoe, gdje je to moguće. Prikazani podaci za nivo BiH ne predstavljaju prosti zbir/prosjek podataka entiteta za svaki od sektora.


Prema podacima BHAS-a za 2024. godinu (statistika nacionalnih računa, rashodni pristup, tromjesečni podaci) procjenjuje se da je **realni rast BDP-a u Bosni i Hercegovini iznosio 2,5%**.¹ Domaća tražnja kroz povećanje potrošnje i investicija predstavljala je glavni oslonac rasta, dok je trgovinski bilans usljed smanjenja izvoza imao negativan doprinos ekonomskom rastu. Pregled strukture ekonomskog rasta u Bosni i Hercegovini u 2024. godini po komponentama rasta prikazan je na grafikonu ispod.



Izvor: BHAS

¹ Agencija za statistiku Bosne i Hercegovine, Saopštenje, „Bruto domaći proizvod, rashodni pristup, tromjesečni podaci za K4 2024. godinu“, 31.03.2025. godine.

Kada su u pitanju ekonomska kretanja u 2025. godini vrijedi istaći da je raspoloživost podataka za potrebe analize bila dosta ograničena. Na bazi raspoloživih domaćih i međunarodnih pokazatelja može se konstatovati da je trend rasta ekonomske aktivnosti kako u Bosni i Hercegovini tako i u vanjskom okruženju nastavljen. Naime, prema preliminarnim podacima Eurostat-a registrirana stopa ekonomskog rasta na nivou EU27 u K1 2025. godine iznosila je 1,6%, što je nešto više u odnosu na isti period prethodne godine.² Uporedni prikaz trenda kretanja BDP-a u Bosni i Hercegovini i EU27 po kvartalima prikazan je na grafikonu ispod.



Izvor: BHAS i EUROSTAT

Ako se ima u vidu da ekonomska kretanja u zemljama EU predstavljaju veoma važnu strukturnu odrednicu ekonomskih trendova u Bosni i Hercegovini može se zaključiti da je nastavak istih prilično očekivan. U nedostatku podataka iz nacionalnih računa a na bazi trenutno raspoloživih različitih kratkoročnih statistika procjenjuje se da je u Bosni i Hercegovini u periodu januar-april 2025. godine rast ekonomske aktivnosti nastavljen. Trenutno raspoloživi statistički podaci na tržištu rada ukazuju da je tokom posmatranog perioda došlo do povećanja broja zaposlenih lica od oko 1%, realnog rasta plata od skoro 10%, koji bi uz porast priliva doznaka građana iz inostranstva i rasta kredita u sektoru stanovništva od oko 10% mogli ukazivati na povećanje privatne potrošnje u Bosni i Hercegovini. S druge strane, vrijedi istaći da je inflacija u Bosni i Hercegovini u periodu januar-april 2025. godini mjerena indeksom potrošačkih cijena iznosila oko 3,4% što je nešto više u odnosu na prethodnu godinu. Međutim, podaci o povećanju ukupnih javnih prihoda za 7,1% i povećanju prikupljenih neto prihoda od PDV-a za 3,4% na indirektan način potvrđuju pretpostavku o nastavku trenda rasta privatne potrošnje u Bosni i Hercegovini. Pored privatne potrošnje, vrlo vjerovatno je došlo i do povećanja javne potrošnje (podaci nisu bili dostupni) obzirom na najavljena povećanja minimalne plate kako u privatnom tako i u javnom sektoru na različitim nivoima u Bosni i Hercegovini. Ove procjene o nastavku trenda rasta ukupne potrošnje (privatne i javne) obzirom na zastupljenost potrošnje u strukturi BDP-a od oko 2/3 gotovo sigurno se će rezultirati povećanjem BDP-a u zemlji tokom posmatranog perioda. Zvanični podaci o kretanjima javnih i privatnih investicija u 2025. godini nisu bili raspoloživi za upotrebu prilikom pripreme ovog izvještaja. Međutim, povećanje kredita u sektoru nefinansijskih poduzeća od oko 9% i porast uvoza kapitalnih dobara za 4,4% mogu biti informativni kada je u pitanju kretanja investicija u Bosni i Hercegovini u K1 2025. godine. S druge strane, određeni pokazatelji iz vanjskog okruženja kao i preliminarni podaci o vanjskotrgovinskoj robnoj razmjeni u Bosni i Hercegovini su nešto povoljniji u odnosu na prethodnu godinu. Poboljšanje ovih makroekonomskih indikatora u K1 2025. godine moglo bi

² <https://ec.europa.eu/eurostat/en/web/products-euro-indicators/w/2-06062025-ap>

ukazivati na nešto bolji doprinos vanjskog sektora u strukturi ekonomskog rasta u Bosni i Hercegovini u 2025. godini. Naime, prema podacima Eurostat-a preliminarna stopa rasta BDP-a u zemlja EU iznosila je 1,6%, što se odrazilo na izvoznu tražnju za bh. izvoznim proizvodima. Naime, prema preliminarnim podacima BHAS-a za period januar-april 2025. godine izvoz roba iz Bosne i Hercegovine uvećan je za 5,3% u odnosu na isti period prethodne godine. S druge strane, stopa rasta uvoza roba u Bosnu i Hercegovine iznosila je 4,8% što je poseljedica trenda rasta domaće tražnje (potrošnja i investicije). Ovakva kretanja izvoza i uvoza djelimično su stabilizirali trend rasta vanjskotrgovinskog deficita, tako da je doprinos istog u strukturi rasta bio nešto povoljniji u odnosu na isti period prethodne godine.

Pregled makroekonomskih indikatora u 2024. i 2025. godini po mjesecima

		2024.	2025.			
Naziv indikatora	Mjerna jedinica		I	II	III	IV
1. Realni sektor						
*BDP	stopa rasta g/g u %	2,5	N/A	N/A	N/A	N/A
** Populacija	u milionima	N/A	N/A	N/A	N/A	N/A
*BDP/per capita	u KM	N/A	N/A	N/A	N/A	N/A
Fizički obim indust. proizvodnje	stopa rasta g/g u %	-4,2	-0,8	-6,1	-0,6	-0,1
Prerađivačka indust.	stopa rasta g/g u %	-4,4	0,6	-8,2	-3,7	-1,1
Građevinarstvo	stopa rasta g/g u %	2,8	N/A	N/A	0,4	N/A
Maloprodaja	stopa rasta g/g u %	6,4	-1,3	-4,4	-2,9	-1,4
Turizam	stopa rasta g/g u %	10,3	8,5	3,9	-5,8	N/A
2. Tržište rada						
Zaposlenost	u hiljadama	855,8	860,0	857,7	854,8	N/A
Rast zaposlenosti	stopa rasta g/g u %	0,7	1,2	0,8	0,5	N/A
Nezaposlenost	u hiljadama	328,6	323,6	324,3	324,2	320,0
Rast nezaposlenosti	stopa rasta g/g u %	-5,8	-5,0	-4,2	-3,3	-3,0
Prosječna neto plata	u KM	1.381	1.508	1.506	1.534	N/A
Nominalni rast prosječne neto plate	stopa rasta g/g u %	9,4	13,5	12,6	13,4	N/A
3. Vanjski sektor						
Izvoz roba	stopa rasta g/g u %	-3,7	4,2	8,1	8,2	1,0
Uvoz roba	stopa rasta g/g u %	3,2	9,8	3,6	4,0	2,8
Trgovinski bilans	stopa rasta g/g u %	13,7	18,8	-2,2	-0,7	5,5
*Bilans tekućeg računa	udio % BDP	-4,0	N/A	N/A	N/A	N/A
*Direktna strana ulaganja	udio % BDP	3,8	N/A	N/A	N/A	N/A
Devizne rezerve (kraj perioda)	u mlrd. KM	17,6	17,3	17,0	16,9	17,1
4. Monetarni agregati i cijene						
Inflacija, CPI	stopa rasta g/g u %	1,7	3,3	3,5	3,2	3,4
Hrana	stopa rasta g/g u %	1,6	5,2	5,7	6,3	7,2
Goriva i maziva	stopa rasta g/g u %	-3,8	-3,6	-4,2	-8,4	-12,7
Proizvođačke cijene (kraj perioda)	stopa rasta g/g u %	2,7	3,3	4,1	3,1	2,9
M2 (kraj perioda)	stopa rasta g/g u %	9,3	8,9	8,4	7,5	7,8
5. Bankarski sektor						
Ukupni krediti (kraj perioda)	stopa rasta g/g u %	9,8	9,8	10,1	10,0	10,2
Ukupni depoziti (kraj perioda)	stopa rasta g/g u %	8,8	8,4	7,8	6,3	7,2
6. Javne finansije						
Ukupni javni prihodi (porezi, doprinosi,dr.)	stopa rasta g/g u %	9,4	2,6	8,6	9,0	6,9
Direktni porezi	stopa rasta g/g u %	13,7	1,1	11,9	-0,2	8,3
Socijalni doprinosi	stopa rasta g/g u %	10,2	8,2	14,6	15,9	11,7
Bruto prihodi od indirektnih poreza	stopa rasta g/g u %	8,5	1,2	3,7	8,8	2,6
Neto prihodi od indirektnih poreza	stopa rasta g/g u %	11,8	-0,3	-0,3	16,1	-0,5
Neto prihodi od PDV	stopa rasta g/g u %	11,5	0,9	-0,3	18,3	-2,6
*Javni dug sektora vlade	udio u % BDP	26,8	N/A	N/A	24,1	N/A

1. U tabeli su prikazani zvanični podaci Agencije za statistiku Bosne i Hercegovine i administrativni podaci određenih institucija u Bosni i Hercegovini.
2. Prikazane stope rasta po mjesecima predstavljaju kretanje pokazatelja u navedenom mjesecu u odnosu na isti mjesec prethodne godine.
3. * označava pokazatelje koji su dostupni samo nivou kvartalnih vremenskih serija (mart- K1), (juni- K2), (septembar- K3) i (decembar-K4).
4. ** Posljednji raspoloživi podatak je procjena za 2023. godinu (3,422 miliona). Izvor: BHAS, Demografija 2023.

1. Realni sektor

Kretanje industrijske proizvodnje

Trend kretanja fizičkog obima industrijske proizvodnje u Bosni i Hercegovini pored proizvodnih procesa u zemlji, u velikoj mjeri je određen ekonomskim kretanjima u glavnim trgovinskim partnerima odnosno izvoznom tražnjom. Obzirom da je u posljednje vrijeme ekonomska aktivnost u zemljama EU bila prilično stagnantna to se odrazilo i na trend kretanja fizičkog obima industrijske proizvodnje u zemlji. Naime, Bosna i Hercegovina već duži vremenski period bilježi trend usporavanja fizičkog obima industrijske proizvodnje. U skladu sa ovim vanjskim kretanjima Bosna i Hercegovina bilježi niži nivo fizičkog obima industrijske proizvodnje, ovo se naročito odnosi na prerađivačku industriju. Naime, trenutno raspoloživi statistički podaci za 2025. godinu ukazuju da je negativan trend u okviru industrijske proizvodnje u Bosni i Hercegovini nastavljen. Tako je prema podacima BHAS-a za period januar-april 2025. godine u Bosni i Hercegovini registriran pad fizičkog obima industrijske proizvodnje od 2,0% u odnosu na isti period prethodne godine.³ S druge strane, ako se posmatra na mjesečnom nivou, prema posljednjim raspoloživim podacima BHAS-a proizvodnja u aprilu 2025. godine u odnosu na isti mjesec prethodne godine smanjena za 0,1%. Ako se kretanja fizičkog obima industrijske proizvodnje posmatraju na entitetskom nivou može se konstatovati da je trend kretanja ujednačen. Tabelarni prikaz kretanja fizičkog obima industrijske proizvodnje u Bosni i Hercegovini po entitetima za period januar-april 2025. godine prikazan je ispod.

Tabela 1: Kretanje fizičkog obima industrijske proizvodnje u periodu januar-april 2025. godine, po entitetima (stopa rasta u %, g/g)


2025	Federacija Bosne i Hercegovina	Republika Srpska
april	0,7%	-1,1%
januar-april	-0,9%	-4,4%

Izvor: Federalni zavod za statistiku Federacije Bosne i Hercegovine i Republički zavod za statistiku Republike Srpske

S druge strane, sektorski posmatrano prema podacima BHAS-a za period januar-april 2025. godine pad obima proizvodnje u rudarstvu iznosio 2,6%, prerađivačkoj industriji 3,2%, dok je u okviru sektora za proizvodnju električne energije zabilježeno povećanje proizvodnje od 4,1%. Pregled strukture fizičkog obima industrijske proizvodnje po sektorima prikazan je na grafikonu ispod.

³ Agencija za statistiku Bosne i Hercegovine, Saopštenje, „Indeks obima industrijske proizvodnje u Bosni i Hercegovini za april 2025. godine-prethodni podaci“, 26.05.2025. godine.


Grafikon 3: Kretanje fizičkog obima industrijske proizvodnje u Bosni i Hercegovini, januar-april 2025. godini po sektorima (rast g/g)



Izvor: BHAS

Na osnovu ovih pokazatelja može se zaključiti da je pad proizvodnje u okviru prerađivačke industrije koja čini 3/4 ukupne industrije i ima visok stepen izvozne orijentacije, predstavljao jedan od ključnih razloga za pad ukupnog obima industrijske proizvodnje u Bosni i Hercegovini u periodu januar-april 2025. godine. Kao što je ranije navedeno trendovi kretanja u okviru prerađivačke industrije u Bosni i Hercegovini skoro u potpunosti su determinisani kretanjima iste u glavnim trgovinskim partnerima. S druge strane, posmatrano po granama najznačajnija smanjenja proizvodnje a samim tim i negativan doprinos u okviru ukupne prerađivačke industrije imale su izvozno orijentirane grane proizvodnje. Grafički prikaz kretanja proizvodnje u okviru prerađivačke industrije u Bosni i Hercegovini po granama u periodu januar-april 2025. godine prikazan je ispod.

Grafikon 4: Prerađivačka industrija po granama januar – april 2025. godine (stopa rasta g/g)



Izvor: BHAS

Maloprodaja

Prema zvaničnim podacima BHAS-a promet u ukupnoj trgovini, u periodu januar-april 2025. godine, iznosio je 5,42 milijarde KM i niži je za 136 miliona KM u odnosu na isti period prethodne godine (pad prometa od 2,5% g/g).

Smanjen promet u navedenom razdoblju nije se mogao osjetiti kod trgovine motornim gorivima u specijaliziranim prodavnicama (u daljem tekstu s.p.) gdje je ostvaren rast od 5,4% g/g (promet je iznosio 977 miliona KM i uvećan je za 50 miliona KM) dok je sa druge strane u trgovini na malo osim trgovine motornim gorivima u s.p. zabilježeno realno smanjenje prometa od 4% g/g (promet je iznosio 4,4 milijarde KM i niži je za 186 miliona KM). Pad prometa u maloprodaji zabilježen je u sva četiri mjeseca 2025. godine, pa je tako promet u januaru niži za 1,3% g/g, februaru 4,4% g/g, martu 2,9% g/g, aprilu 1,4% g/g.

Tabela 2: Ukupna maloprodaja po entitetima (stopa rasta u %, g/g)


2025. godina	Republika Srpska	Federacija Bosne i Hercegovine
januar-april	7,4	-0,4
april	11,9	1,8

Izvor: Republički zavod za statistiku Republike Srpske⁴, Federalni zavod za statistiku Federacije Bosne i Hercegovine⁵

Podaci prikazani u tabeli iznad se razlikuju od podataka BHAS-a zbog korištenja različitih modela koji se koriste za desezoniranje podataka.

Prema zvaničnim podacima BHAS-a ukupna trgovina na malo u mjesecu aprilu 2025. godine, u odnosu na isti mjesec prethodne godine, zabilježila je realno smanjenje prometa od 1,4%⁶. Ovo smanjenje je dobrim dijelom izazvano nižim prometom u trgovini na malo, osim trgovine motornim gorivima u s.p. gdje je zabilježen manji promet za 2,1% g/g (promet u ovoj kategoriji je iznosio 1,26 milijardi KM i niži je za 27 miliona KM). Sa druge strane trgovina motornim gorivima na malo u s.p. ostvarila je porast prometa za 1,7% g/g (promet iznosio 267 miliona KM, uvećan za 4,5 miliona KM).

Grafikon 5: Ukupna trgovina na malo u Bosni i Hercegovini – po mjesecima u 2025. godini (rast g/g u %)⁷



Izvor: BHAS

⁴ Izvor podataka: Republički zavod za statistiku Republike Srpske Trgovina na malo, april 2025. godine

⁵ Izvor podataka: Federalni zavod za statistiku Federacije Bosne i Hercegovine, Trgovina na malo prvi rezultati za april/travanj 2025. godine

⁶ Izvor podataka: BHAS, Indeksi prometa trgovine na malo u Bosni i Hercegovini, april 2025. godine

⁷ Promet trgovine na malo, realna - kalendarski prilagođena serija, 2006-2025, u milionima KM

U mjesecu aprilu 2025. godine kod trgovine na malo hranom, pićem i duhanskim proizvodima u nespecijaliziranim prodavnicama (u daljem tekstu n.p.) je zabilježeno smanjenje prometa od 3,1% (promet je iznosio 375 miliona KM, promet smanjen za 12 miliona KM). U trgovini na malo hranom, pićem i duhanskim proizvodima u s.p. je također, u mjesecu aprilu 2025. godine, zabilježeno je smanjenje prometa za 8,1% g/g (promet je iznosio 28 miliona, niži je za 2,5 miliona KM). U okviru trgovine na malo neprehrambenim proizvodima najveće smanjenje prometa je zabilježeno u okviru trgovine na malo ostalom robom koja je u aprilu 2025. godine niža za 4,1% g/g (promet je iznosio 567 miliona KM i smanjen je za 24,2 miliona KM). Smanjenje prometa zabilježeno i u okviru trgovine na malo proizvodima za kulturu i rekreaciju (promet manji za 15,5%, odnosno za 3,6 miliona KM). U sklopu trgovine neprehrambenim proizvodima porast prometa je zabilježen u trgovini na malo ostalom opremom za domaćinstvo u s.p. gdje je registrovano povećanje prometa od 14,4% g/g (odnosno promet je uvećan za 15,5 miliona KM). Kod trgovine ostalom robom u s.p. najveći pad prometa, u mjesecu aprilu 2025. godine, od 6,8% g/g zabilježen je u trgovini na malo tekstilom, odjećom, obućom i proizvodima od kože (promet je iznosio 415 miliona KM i niži je za 30 miliona KM). Promet u trgovini na malo sportskom opremom, igrama i igračkama niži je za 22,2% g/g (odnosno za 4,6 miliona KM). Izuzetak u okviru trgovine ostalom robom u s.p. predstavlja trgovina na malo namještajem, opremom za rasvjetu i električnim aparatima za domaćinstvo gdje je promet porastao za 45% g/g (ukupan promet u ovoj kategoriji iznosio je 48,1 miliona KM i viši je za 14,9 miliona KM).

Gradevinarstvo

Zvanični podaci BHAS-a za ukupne građevinske radove u Bosni i Hercegovini ukazuju na porast radova od 0,4% u K1 2025. godine, u odnosu na isti period prethodne godine. Do ovog rasta je isključivo došlo usljed povećanja radova u sektoru visokogradnje gdje je zabilježeno povećanje radova od 1,6% g/g dok su istovremeno u sektoru niskogradnje radovi smanjeni za 0,5% g/g.




Tabela 3: Građevinski radovi u K1 2025. godine, po entitetima (stopa rasta u %, g/g)

	Republika Srpska	Federacija Bosne i Hercegovine
K1	-5,1	3,5

Izvor: Republički zavod za statistiku Republike Srpske, Federalni zavod za statistiku Federacije Bosne i Hercegovine

Broj izdatih odobrenja za građenje u K1 2025. godine u odnosu na K1 2024. godine viši je za 3,5%. Na povećanje izdatih odobrenja za građenje najviše je uticao sektor visokogradnje u kojem je zabilježen rast izdatih odobrenja od 9,4% g/g (broj izdatih dozvola za stambene zgrade je viši za 15,2% g/g dok je istovremeno broj izdatih dozvola za građenje nestambenih zgrada niži za 5,8% g/g). U niskogradnji je zabilježeno smanjenje izdatih odobrenja za 9,1% g/g.

Tržište rada

Podatak o broju zaposlenih lica u Bosni i Hercegovini za april 2025. godine nije objavljen u periodu pripreme Informacije, pa se podaci u tekstu odnose na mart odnosno prvi kvartal 2025. godine.

U Bosni i Hercegovini u martu 2025. godine broj zaposlenih lica iznosio je 854,8⁸ hiljada i veći je za 0,5% u odnosu na mart 2024. godine. U periodu I-III 2025. godine prosječan broj zaposlenih lica u Bosni i Hercegovini iznosio je oko 857,5 hiljada i veći je za 0,8% u poređenju sa I-III 2024. godine. Broj zaposlenih lica po entitetima predstavljen je u tabeli ispod.

Na usporen rast broja zaposlenih lica najviše je uticalo smanjenje broja zaposlenih u djelatnosti industrijske proizvodnje. Broj zaposlenih lica u prerađivačkoj industriji u periodu I-III 2025. godine je smanjen za 2,6% g/g uz smanjenje obima proizvodnje u ovoj industriji (detaljnije u poglavlju Industrijska proizvodnja). Na taj način ova djelatnost je imala negativan doprinos rastu ukupnog broja zaposlenih lica od 0,5 p.p. S druge strane, u prvom kvartalu 2025. godine najveći doprinos rastu broja zaposlenih lica u Bosni i Hercegovini bio je u oblasti trgovine, hotelijerstva i ugostiteljstva, a zatim djelatnosti zdravstvene zaštite. U djelatnosti trgovine na veliko i malo, popravka motornih vozila i motocikala broj zaposlenih lica je uvećan za 2,7% u periodu I-III 2025. godine (uz doprinos rastu ukupnog broja zaposlenih lica od 0,5 p.p.).⁹ U djelatnosti pružanja smještaja te pripreme i usluživanja hrane broj zaposlenih uvećan za 4,1%¹⁰ g/g uz doprinos rastu ukupnog broja zaposlenih oko 0,2 p.p. Pored ove djelatnosti, doprinos rastu ukupnog broja zaposlenih lica od 0,2 p.p. bio je u području djelatnosti zdravstvene i socijalne zaštite sa stopom rasta od 3%. Iako je u mnogim drugim djelatnostima registrovan rast broja zaposlenih njihov doprinos rastu ukupnog broja zaposlenih lica bio je nešto manji u odnosu na prethodno pomenute djelatnosti.

Tabela 4: Broj zaposlenih¹¹ lica

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
I-XII 2024	855.764	0,7%	547.660	1,2%	289.722	-0,3%
I 2025	860.041	1,2%	547.291	1,0%	-	-
II 2025	857.707	0,8%	545.427	0,5%	-	-
III 2025	854.831	0,5%	543.165	0,0%	-	-
I-III 2025	857.526	0,8%	545.294	0,5%	-	-

Izvor: Agencija za statistiku Bosne i Hercegovine, Federalni zavod za statistiku Federacije Bosne i Hercegovine, Republički zavod za statistiku Republike Srpske

⁸ Privremeni podatak. Izvor: BHAS.

⁹ Ukupan promet trgovine na malo u Bosni i Hercegovini, posmatran u tekućim cijenama, u martu 2025. godine ostvario je rast od 0,6% u odnosu na isti mjesec prethodne godine. Izvor: BHAS, Poslovne statistike, indeks prometa trgovine na malo, mart 2025. godine.

¹⁰ U periodu januar – mart 2025. turisti su ostvarili 294.860 posjeta, što je za 1,9% više u odnosu na isti period 2024. godine. U periodu januar – mart 2025. turisti su ostvarili 655.369 noćenja, što je za 2,0% više u odnosu na isti period 2024. godine. Izvor: BHAS, Poslovne statistike, turizam januar-mart 2025. godine, kumulativ.

¹¹ Podaci o broju zaposlenih lica za Bosnu i Hercegovinu do septembra 2024. godine su konačni, a nakon toga podaci su privremeni. U Republici Srpskoj podaci o broju zaposlenih lica se objavljuju za mart i septembar svake godine.

Broj registrovanih nezaposlenih lica u aprilu 2025. godine nastavio se smanjivati (-3% g/g) i iznosio je oko 320 hiljada. Smanjenje broja nezaposlenih lica u poređenju sa prethodnom godinom je registrovano u oba entiteta što se može vidjeti u tabeli ispod.

Tabela 5: Broj registrovanih nezaposlenih lica

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
I-XII 2024	328.623	-5,8%	260.298	-6,1%	56.323	-7,8%
I 2025	323.628	-5,0%	257.914	-4,1%	53.956	-8,6%
II 2025	324.314	-4,2%	258.831	-3,1%	53.749	-8,7%
III 2025	324.233	-3,3%	259.278	-2,1%	53.279	-8,7%
I-III 2025	324.058	-4,2%	258.674	-3,1%	53.661	-8,7%
IV 2025	320.036	-3,0%	255.881	-1,8%	52.552	-8,4%

Izvor: Agencija za statistiku Bosne i Hercegovine, Agencija za rad i zapošljavanje Bosne i Hercegovine, Zavod za zapošljavanje Republike Srpske, Federalni zavod za zapošljavanje Federacije Bosne i Hercegovine

Podatak o prosječnoj neto plati u Bosni i Hercegovini za april 2025. godine nije objavljen u periodu pripreme Informacije, pa se podaci u tekstu odnose na mart odnosno prvi kvartal 2025. godine.

Prosječna neto plata u Bosni i Hercegovini u martu 2025. godine iznosila je 1.534 KM i nominalno je veća za 13,4% u odnosu na mart 2024. godine. U prosjeku perioda I-III 2025. godine prosječna neto plata je iznosila 1.516 KM i nominalno je uvećana za 13,1% u odnosu na isti period 2024. godine uz sporiji realni rast od 9,4% zbog rasta cijena – inflacije. Kretanje prosječne neto plate po entitetima predstavljeno je u tabeli ispod.

Najveća prosječna isplaćena neto plata u Bosni i Hercegovini u periodu I-III 2025. godine bila je u području djelatnosti informacija i komunikacija (2.081 KM) te finansijskih djelatnosti i djelatnosti osiguranja (2.025 KM), dok je najniža prosječna isplaćena neto plata u području djelatnosti pružanja smještaja, te pripreme i usluživanja hrane (1.115 KM).

Posmatrajući nominalni rast neto plata po djelatnostima najveće stope rasta neto plate u periodu I-III 2025. godine bile su u područjima djelatnosti pružanja smještaja, te pripreme i usluživanja hrane (25,9% g/g), administrativnih i pomoćnih uslužnih djelatnosti (20% g/g), te građevinarstvu (20,8% g/g). Sve ostale djelatnosti su registrovale sporije stope rasta neto plata u odnosu na pomenute djelatnosti. Bitno je napomenuti da je u djelatnostima koje zapošljavaju najviše lica u Bosni i Hercegovini takođe zabilježen značajan nominalni rast neto plata. Tako je u prerađivačkoj industriji prosječna neto plata uvećana za 19,1% g/g, a u djelatnosti trgovine na veliko i malo, popravka motornih vozila i motocikala neto plata je uvećana za 20,2% g/g.

Tabela 6: Prosječna neto plata (u KM) i nom. stope rasta u odnosu na isti period prethodne godine

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
I-XII 2024	1.381	9,4%	1.373	8,9%	1.404	10,2%
I 2025	1.508	13,5%	1.546	15,5%	1.434	9,3%
II 2025	1.506	12,6%	1.525	16,0%	1.475	6,0%
III 2025	1.534	13,4%	1.565	17,2%	1.476	5,9%
I-III 2025	1.516	13,1%	1.545	16,3%	1.462	7,0%

Izvor: Agencija za statistiku Bosne i Hercegovine, Federalni zavod za statistiku Federacije Bosne i Hercegovine, Republički zavod za statistiku Republike Srpske

Ukupan broj penzionera koji prima samostalnu penziju u Bosni i Hercegovini u aprilu 2025. godine iznosio je 659,7 hiljada i veći je za 1,7% u odnosu na isti mjesec 2024. godine.¹² U Bosni i Hercegovini prosječna samostalna penzija u aprilu 2025. godine je uvećana za 5,7% g/g i iznosila je oko 703¹³ KM što je podstaknuto uvećanjem penzija u oba entiteta.¹⁴ Najniža penzija u Federaciji Bosne i Hercegovine od aprila 2025. godine je uvećana i iznosi 599,3 KM, a u Republici Srpskoj najniža penzija se nije mijenjala u odnosu na prethodni mjesec i iznosila je 318,6¹⁵ KM za penzijski staž do 15. godina. Prosječne penzije u entitetima su predstavljene u tabeli ispod.

Tabela 7: Prosječna samostalna penzija (u KM)

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
XII 2024	667,5	8,2%	724,6	7,3%	594,4	9,8%
I 2025	683,7	3,8%	725,2	2,1%	630,3	6,5%
II 2025	684,0	3,8%	725,3	2,1%	630,9	6,6%
III 2025	684,7	3,8%	726,4	2,1%	631,3	6,6%
IV 2025	703,3	5,7%	759,4	5,1%	631,6	6,6%

Izvor: Federalni zavod za penzijsko i invalidsko osiguranje Federacije Bosne i Hercegovine, Fond za penzijsko i invalidsko osiguranje Republike Srpske

2. Javne finansije

U prva četiri mjeseca 2025. nastavljani su pozitivni trendovi u naplati ukupnih javnih prihoda. Prema trenutno raspoloživim podacima, u Bosni i Hercegovini ukupno je prikupljeno oko 8,2 milijarde KM javnih prihoda, po osnovu indirektnih i direktnih poreza, socijalnih doprinosa, taksi, kazni i naknada. Time su ukupni javni prihodi, u poređenju sa istim periodom prethodne godine, veći za oko 7,1%. Ukoliko bi se posmatrali javni prihodi na mjesečnom nivou, uočava se da su u aprilu mjesecu ukupni javni prihodi ostvarili stopu rasta od oko 6,9% g/g.

Indirektni porezi

Od 01.01.2025. na snazi je Odluka o utvrđivanju posebne i minimalne akcize na cigarete i duvan za pušenje za 2025. godinu¹⁶.

¹² Broj penzionera u Bosni i Hercegovini u analizi predstavlja zbir penzionera koji primaju samostalne penzije od Federalnog zavoda za penzijsko i invalidsko osiguranje i Fonda za penzijsko i invalidsko osiguranje Republike Srpske bez obzira na mjesto prebivališta (u ili izvan Bosne i Hercegovine). Uzme li se u obzir i broj korisnika srazmjerne penzije u Federaciji Bosne i Hercegovine ukupan broj penzionera u Bosni i Hercegovini iznosi oko 745,5 hiljada. Podaci o srazmjernim penzijama u Republici Srpskoj nisu objavljeni u statističkom biltenu.

¹³ Prosječna samostalna penzija u Bosni i Hercegovini je izračunata na osnovu prosječnih samostalnih mjesečnih penzija ponderisanih udjelom ukupnog broja penzionera u svakom od entiteta u ukupnom broju penzionera. Uzme li se u obzir i broj korisnika srazmjerne penzije u Federaciji Bosne i Hercegovine prosječna penzija u Bosni i Hercegovini iznosi oko 644 KM. Podaci o srazmjernim penzijama u Republici Srpskoj nisu objavljeni u statističkom biltenu.

¹⁴ U Republici Srpskoj penzije ostvarene do 31. decembra 2024. godine svim korisnicima prava usklađuju se od 01. januara 2025. godine i povećavaju u ukupnom iznosu za 6%. Izvor: Fond za penzijsko i invalidsko osiguranje Republike Srpske.

U Federaciji Bosne i Hercegovine na osnovu Odluke Upravnog odbora Federalnog zavoda za MIO/PIO o redovnom usklađivanju, penzije u aprilu 2025. godine su uvećane za 4,49%. S obzirom na to da se redovno usklađivanje primjenjuje retroaktivno od 1. januara 2025. godine, korisnicima će prilikom isplate za april biti isplaćena i razlika između ranije isplaćenih i uvećanih penzija za prva tri mjeseca tekuće godine. Izvor: Federalni zavod za penzijsko i invalidsko osiguranje.

¹⁵ U Republici Srpskoj za penzijski staž 15-20 godina najniža penzija je iznosila 382,40 KM, za penzijski staž 20-30 godina iznosila je 446,15 KM, za penzijski staž 30-40 godina iznosila je 509,94 KM i za penzijski staž 40 i više godina najniža penzija je iznosila 637,43 KM. U Republici Srpskoj najniža penzija je uvećana od januara 2025. godine.

¹⁶ Odluka o utvrđivanju posebne i minimalne akcize na cigarete i iznos akcize na duvan za pušenje za 2025. godinu („Službeni glasnik BiH“, broj 84/24), a koja se primjenjuje od 01.01.2025. godine. Odlukom je definisano da se od 01.01.2025. godine, na cigarete i duvan za pušenje plaća sljedeća akciza i to:

Naplaćeni prihodi. U poređenju se prethodnim mjesecom tekuće godine, ali i sa aprilom 2024. godine, prihodi naplaćeni od strane Uprave za indirektno oporezivanje Bosne i Hercegovine (dalje u tekstu UIO) su tokom mjeseca aprila ostvarili nešto skromniju stopu rasta. Skroman, mjesečni rast prihoda od indirektnih poreza koji je prisutan od početka godine, značajno je uticao na stopu rasta u kumulativu. U periodu januar- april UIO je ukupno prikupila oko 3,7 milijardi KM javnih prihoda, što je za oko 4,1% više nego u istom periodu prethodne godine. Rast povrata novčanih sredstava sa Jedinštenog računa UIO (JR UIO), tokom posmatranog perioda, značajno se odrazio na neto naplatu, koja je ostvarila rast od oko 3,5% g/g. Neto prihodi od indirektnih poreza su iznosili oko 3,0 milijarde KM. Pozitivan doprinos stopi rasta neto prihoda od indirektnih poreza dali su: porez na dodatu vrijednost od 2,3 p.p. (u daljem tekstu PDV), prihodi od akciza 0,7 p.p., prihodi carina sa po 0,5 p.p.

Tabela 8: Naplata i raspodjela prihoda od indirektnih poreza (rast g/g u % ako nije drugačije naznačeno)

	struktura 2025	jan-apr 2024	jan-apr 2025	feb 2025	mar 2025	apr 2025
Bruto prihodi - prikupljeno	100,0	12,4	4,1	3,7	8,8	2,7
<i>Povrati</i>	<i>18,4</i>	<i>-3,2</i>	<i>6,4</i>	<i>22,5</i>	<i>-15,8</i>	<i>17,5</i>
Neto prihodi - prikupljeno	81,6	16,9	3,5	-0,3	16,0	-0,4
<i>PDV</i>	<i>53,8</i>	<i>15,1</i>	<i>3,4</i>	<i>-0,3</i>	<i>18,3</i>	<i>-2,6</i>
<i>Carine</i>	<i>5,0</i>	<i>22,6</i>	<i>7,5</i>	<i>6,6</i>	<i>7,4</i>	<i>1,7</i>
<i>Akcize</i>	<i>15,9</i>	<i>22,2</i>	<i>3,9</i>	<i>-0,2</i>	<i>16,4</i>	<i>5,2</i>
<i>Putarine</i>	<i>6,3</i>	<i>16,4</i>	<i>0,5</i>	<i>-1,9</i>	<i>3,7</i>	<i>0,6</i>
<i>Ostali prihodi</i>	<i>0,2</i>	<i>...</i>	<i>-10,5</i>	<i>-6,8</i>	<i>-21,4</i>	<i>-14,7</i>
<i>Neusklađeni prihodi</i>	<i>0,3</i>	<i>...</i>	<i>3,9</i>	<i>-39,1</i>	<i>81,5</i>	<i>55,0</i>
Raspoloživo za raspodjelu	100,0	12,1	4,0	1,9	9,7	1,1
<i>Minimalne rezerve</i>	<i>18,8</i>	<i>-3,1</i>	<i>6,6</i>	<i>19,4</i>	<i>-14,6</i>	<i>16,7</i>
Budžeti	81,2	16,6	3,4	-1,9	17,0	-2,4
Servisiranje vanjskog duga	12,2	20,5	-0,6	20,3	-2,5	-12,8
<i>Federacija Bosne i Hercegovine</i>	<i>8,1</i>	<i>18,2</i>	<i>0,2</i>	<i>20,2</i>	<i>-3,6</i>	<i>-9,5</i>
<i>Republika Srpska</i>	<i>4,0</i>	<i>24,4</i>	<i>-2,1</i>	<i>20,5</i>	<i>1,6</i>	<i>-18,4</i>
<i>Brčko Distrikt</i>	<i>0,1</i>	<i>49,8</i>	<i>-6,3</i>	<i>21,1</i>	<i>-5,6</i>	<i>-5,0</i>
Raspodjeljeno nakon servisiranja vanjskog duga	69,0	15,8	4,2	-5,5	20,4	0,7
<i>Institucije Bosne i Hercegovine</i>	<i>9,1</i>	<i>1,2</i>	<i>-2,5</i>	<i>-6,0</i>	<i>-1,3</i>	<i>-1,3</i>
<i>Federacija Bosne i Hercegovine</i>	<i>36,5</i>	<i>17,7</i>	<i>5,2</i>	<i>-5,5</i>	<i>25,4</i>	<i>-0,1</i>
<i>Republika Srpska</i>	<i>21,0</i>	<i>20,4</i>	<i>5,6</i>	<i>-6,0</i>	<i>21,7</i>	<i>3,7</i>
<i>Brčko Distrikt</i>	<i>2,4</i>	<i>17,5</i>	<i>4,9</i>	<i>0,4</i>	<i>25,4</i>	<i>-2,5</i>

Izvor: UIO Bosne i Hercegovine

PDV. Bruto prihodi od PDV-a, u aprilu 2025. godine, su ostvarili skromnu stopu rasta. Tokom istog mjeseca, povrat sredstava sa JR UIO je značajno porastao. Skroman rast bruto prihoda od PDV-a i rast povrata, doveli su do negativne stope rasta neto prihoda od PDV-a. Ovo je već drugi put u tekućoj godini da bilježe smanjenje, što se svakako odrazilo na prihode posmatrane u kumulativu. Bruto prihodi su u za prva četiri mjeseca 2025. godine, iznosili oko 2,7 milijardi KM, što je za 4,4% više nego u istom periodu prethodne godine. Neto prihodi po osnovu PDV-a, tokom istog perioda, su iznosili oko 2,0 milijarde KM, čime su ostvarili rast od oko 3,4% U periodu januar-april 2025. godine, prihodi od PDV-a po osnovu uvoza roba veći su za oko 5,2% g/g, dok su prihodi naplaćeni iz prometa domaćih roba i usluga veći za oko 3,6% g/g.

Akcize. Od početka godine, prihode od akciza prate oscilacije u kretanju (-7,0% g/g u januaru do 16,4% g/g u martu). U aprilu tekuće godine, isti su ostvarili pozitivnu stopu rasta, koja se

a) proporcionalna akciza, po stopi od 42% na osnovicu utvrđenu u skladu sa članom 15. stav (1) tačka b) Zakona o akcizama u Bosni i Hercegovini ("Službeni glasnik BiH", br. 49/09, 49/14, 60/14, 91/17 i 50/22, u daljnjem tekstu: Zakon) i

b) specifična akciza u iznosu od 82,50 KM za 1.000 komada, odnosno 1,65 KM za pakovanje cigareta od 20 komada
Akciza na duvan za pušenje utvrđuje se u visini od 80% minimalne akcize, utvrđene u članu 3. stav (3) ove odluke i iznosi 143,20 KM po kilogramu.

<http://www.sluzbenilist.ba/page/akt/pS4G2Sohz4nh78h777kohz4nh78h77c=>

odrazila na kumulativ perioda. Po osnovu akciza, u posmatranom periodu 2025. godine, ukupno je naplaćeno oko 567 miliona KM bruto prihoda, što je za oko 4,7% više u poređenju sa istim periodom prethodne godine. Prihodi od uvozi akciza su veći za oko 2,9% g/g. Sa druge strane, domaće akcize su manje za oko 2,7% g/g. Ukupni prihodi od akciza na naftu i derivate nafte su ostvarili neznatnu stopu rasta u poređenju sa istim periodom prethodne godine (0,6% g/g), prihodi od akciza na duvan i duvanske prerađevine viši su za oko 4,3% g/g, dok su prihodi od ostalih akciza takođe ostvarili skroman rast 0,6% g/g.

Putarine. Ukupno naplaćeni prihodi od putarina u periodu januar- april 2025. godine iznosili su oko 224 miliona KM. Naplata prihoda od putarine uglavnom prati naplatu akciza na naftu i naftne derivate, sa određenim razlikama koje potiču od različitih osnovica na koje se obračunava i plaća putarina, odnosno akcize na naftu i derivate nafte. Tokom posmatranog perioda navedeni prihodi su ostvarili neznatno povećanje od oko 0,5% g/g.

Carine. Neto prihodi od carinskih dažbina u periodu januar- april 2025. godine su iznosili oko 206 miliona KM. U poređenju sa istim periodom prethodne godine navedeni prihodi su veći za oko 7,5% g/g.

Raspoređeni prihodi. U periodu januar-april 2025. godine, ukupni prihodi raspoloživi za raspodjelu su iznosili oko 3,7 milijardi KM. Nakon izdvajanja sredstava za izgradnju autoputeva i izgradnju i rekonstrukciju drugih puteva u Bosni i Hercegovini u iznosu od oko 136 miliona KM, minimalne rezerve u iznosu od oko 738 milion KM i sredstava za finansiranje institucija Bosne i Hercegovine u iznosu od 329 miliona KM, UIO Bosne i Hercegovine, je izvršila raspored preostalih sredstava u iznosu od oko 2,5 milijarde KM krajnjim korisnicima prema važećim koeficijentima¹⁷. Od tog iznosa Federaciji Bosne i Hercegovine je doznačeno ukupno oko 1,6 milijarde KM (za servis vanjskog duga oko 339 miliona KM), Republici Srpskoj oko 867 miliona KM (za servis vanjskog duga oko 166 miliona KM) i Brčko Distriktu oko 83 miliona KM (za servis vanjskog duga 5,5 miliona KM). U poređenju sa istim periodom prethodne godine raspoređena sredstva sa jedinstvenog računa UIO za servis vanjskog duga su manja za oko 0,6% g/g, a raspoređena sredstva krajnjim korisnicima, nakon servisiranja obaveza vanjskog duga za 4,2%.

Direktni porezi, doprinosi i neporeski prihodi

Od januara 2025. godine, u primjeni su zakonski akti i mjere koje su donijele i primjenjuju, obje entitetske vlade, koje će se u narednom periodu svakako odraziti na prihode entitetskih poreskih uprava, a o čemu je detaljnije pisano u prethodnim Informacijama¹⁸.

¹⁷ Odlukom Upravnog odbora UIO Bosne i Hercegovine, broj: 02-02-15-3-1/23 od 04.09.2023. godine, utvrđeni su privremeni koeficijenti raspodjele sredstava sa Jedinstvenog računa za period jul-septembar 2023. godine, i isti iznose: BiH 62,01%, RS 34,44%, Brčko Distrikt BiH 3,55%.

¹⁸ <https://fbihvlada.gov.ba/bs/utvrdena-najniza-plata-za-2025-godinu-u-iznosu-od-1000-km>

<https://fbihvlada.gov.ba/bs/11-uredba-o-isplati-pomoci-od-strane-poslodavca>;

<https://www.pufbih.ba/v1/novosti/3181/obavijest-u-vezi-primjene-uredbe-o-isplati-pomoi-radnicima-od-strane-poslodavca>

<https://erp.slglasnik.org/erp/slglasnik.org/rs/sgrs/vlada-republike-srpske/odluka/2025/6/15900>

1) Najniža plata u Republici Srpskoj utvrđuje se u bruto iznosu od 1.344,26 KM, odnosno u neto iznosu od 900,00 KM.

2) Najniža plata za poslove za čije obavljanje se zahtijeva najmanje stečeno srednje obrazovanje u trajanju od tri godine utvrđuje se u bruto iznosu od 1.426,23 KM, odnosno u neto iznosu od 950,00 KM.

3) Najniža plata za poslove za čije obavljanje se zahtijeva najmanje stečeno srednje obrazovanje u trajanju od četiri godine utvrđuje se u bruto iznosu od 1.508,20 KM, odnosno u neto iznosu od 1.000,00 KM.

4) Najniža plata za poslove za čije obavljanje se zahtijeva najmanje stečeno više obrazovanje utvrđuje se u bruto iznosu od 2.000,00 KM, odnosno u neto iznosu od 1.300,00 KM.

Entitetske poreske uprave su u periodu januar-april 2025. godine, ukupno prikupile oko 3,3 milijarde KM javnih prihoda, iz svojih nadležnosti i ostvarile stopu rasta od oko 9,7%. Detalji o naplaćenim prihodima slijede u tabeli ispod. Ako bi se prihodi entitetskih poreskih uprava posmatrali na mjesečnom nivou, uočava se da su prihodi koje je ostvarila PU Republike Srpske u aprilu mjesecu, ostali skoro nepromijenjeni u poređenju sa istim mjesecom prethodne godine (0,5% g/g). To toga je dovelo smanjenje prihoda od direktnih poreza (porez na dobit) ali i smanjenja prihoda po osnovu doprinosa (doprinosi za zdravstvenu zaštitu).

Tabela 9: Prihodi od direktnih poreza, doprinosa, taksi, naknada i kazni u periodu januar-april

Naziv prihoda	Federacija Bosne i Hercegovine			Republika Srpska			Bosna i Hercegovina		
	miliona KM		rast u %	miliona KM		rast u %	miliona KM		rast u %
	2024	2025		2024	2025		2024	2025	
Direktni porezi	591,8	661,1	11,7	419,8	411,3	-2,0	1.011,6	1.072,4	6,0
Porez na dohodak	257,7	311,7	21,0	143,3	161,1	12,4	401,1	472,8	17,9
Porez na dobit	281,2	291,3	3,6	265,7	238,9	-10,1	564,8	530,2	-3,0
Porezi građana	52,8	58,0	9,9	10,8	11,2	3,7	63,6	69,2	8,8
Ostali porezi	0,1	0,1	0,4	0,0	0,0	...	0,1	0,1	0,4
Takse, kazne i naknade	296,6	297,5	0,3	186,2	199,9	7,3	482,9	497,4	3,0
Doprinosi	1.769,9	2.047,9	15,7	826,7	869,8	5,2	2.596,6	2.917,7	12,4
PIO	992,5	1.142,8	15,1	498,7	521,2	4,5	1.491,2	1.663,9	11,6
Zdravstvo	695,9	810,5	16,5	268,7	285,4	6,2	964,5	1.095,9	13,6
Nezaposleni	81,5	94,6	16,0	15,1	16,2	7,2	96,7	110,8	14,6
Dječija zaštita	0,0	0,0	...	41,0	43,6	6,3	41,0	43,6	6,3
Zapošljavanje invalida	0,0	0,0	...	3,1	3,4	10,1	3,1	3,4	10,1
Ostali prihodi	0,2	0,3	...	0,0	0,0	...	0,2	0,3	...
UKUPNO	2.658,5	3.006,8	13,1	1.432,7	1.480,9	3,4	4.091,2	4.487,8	9,7

Izvor: entitetske poreske uprave

Socijalni doprinosi. Ukupno prikupljeni prihodi po osnovu socijalnih doprinosa, za period januar-april 2025. godine, su iznosili oko 2,9 milijardi KM, čime su u ostvarili rast od oko 12,4% g/g. Posmatrajući pojedinačne kategorije prihoda od doprinosa, uočava se da one bilježe ujednačene stope rasta, što se može vidjeti iz tabele iznad. Dominantna kategorija ovih prihoda jesu prihodi od doprinosa za penzijsko i invalidsko osiguranje (PIO), koji su zabilježili stopu rasta od oko 11,6% g/g. Ako se navedeni prihodi posmatraju samo u aprilu mjesecu, uočava se da su prihodi koje je ostvarila PU Republike Srpske imal inegativnu stopu rasta usljed smanjenja prihoda od doprinosa za zdravstvenu zaštitu.

Direktni porezi. Prihodi po ovom osnovu na nivou Bosne i Hercegovine, tokom perioda januar-april 2025. godine, su zabilježili usporenje stope rasta. Iako su prihodi po osnovu poreza na dohodak ostvarili značajnu dvocifrenu stopu rasta, kao rezultat povećanja plata, na navedeno usporenje rasta se u značajnoj mjeri odrazilo smanjenje prihoda po osnovu poreza na dobit. Iako podaci poreskih uprava ukazuju na povećanje privrednih subjekata (prema broju novoregistrovanih poslovnih subjekata), pretpostavka je da je njihovo poslovanje negativno. U posmatranom periodu po osnovu direktnih poreza ukupno je naplaćeno oko 1,1 milijarde KM, čime su ostvarili stopu rasta od oko 6,0% g/g.


Takse, kazne i naknade. Po osnovu različitih taksi, naknada i kazni, tokom posmatranog perioda 2025. godine, ukupno je naplaćeno oko 497 miliona KM, što je za oko 3,0% više nego u istom periodu prethodne godine. Na rast prihoda u navedenoj kategoriji najveći doprinos su imali povećani prihodi po osnovi naknada za priređivanje igara na sreću, koncesionih naknada (naknada za korištenje elektroenergetskih objekata i raznih kazni (najvećim dijelom, prekršajne kazne).

3. Cijene, monetarni i finansijski sektor

Cijene

Prema podacima Svjetske banke cijena sirove nafte u aprilu 2025. godine nastavila je da se smanjuje (što se može vidjeti na grafikonu ispod) i iznosila je 65,9 \$/barelu. U odnosu na april 2024. godine cijena sirove nafte bila je niža za 25,1% g/g. S druge strane, u aprilu 2025. godine cijena prirodnog gasa (Evropa) bila je viša za 27,6% u odnosu na april 2024. godine. Indeks cijena hrane na svjetskom tržištu u aprilu 2025. godine bio je niži za 5,5% u odnosu na april 2024. godine. Prema podacima EUROSTAT-a inflacija u EU 27 u aprilu 2025. godine je iznosila 2,4% g/g odnosno za period I-IV 2025. godine je iznosila 2,6%.

Grafikon 7: Kretanje cijena sirove nafte, prirodnog gasa i indeksa hrane na svjetskom tržištu



Izvor: Svjetska banka

Rast cijena u Bosni i Hercegovini nastavljen je početkom drugog kvartala 2025. godine. U aprilu 2025. godine inflacija u Bosni i Hercegovini je iznosila 3,4% u odnosu na isti mjesec prethodne godine. U prosjeku perioda I-IV 2025. godine ukupan rast cijena u poređenju sa I-IV 2024. godine takođe je iznosio 3,4%. U Federaciji Bosni i Hercegovine u periodu I-IV 2025. godine inflacija je iznosila 3,2% g/g, dok je u Republici Srpskoj iznosila 3,4% g/g.

Tabela 10: Indeks potrošačkih cijena (poređenje sa istim periodom prethodne godine)

Period	Bosna i Hercegovina	Federacija Bosne i Hercegovine	Republika Srpska
I-XII 2024	101,7	101,4	101,8
I 2025	103,3	103,3	103,2
II 2025	103,5	103,4	103,6
III 2025	103,2	103,0	103,3
IV 2025	103,4	103,0	103,6
I-IV 2025	103,4	103,2	103,4

Izvor: Agencija za statistiku Bosne i Hercegovine, Federalni zavod za statistiku Federacije Bosne i Hercegovine, Republički zavod za statistiku Republike Srpske

U periodu I-IV 2025. godine rast ukupnog nivoa cijena u Bosni i Hercegovini najznačajnije je podstaknut uvećanjem cijena u odjeljcima hrane i bezalkoholnih pića (najveći odjeljak indeksa potrošačkih cijena) a potom usluga (odjeljci zdravstva, restorana i hotela te ostalih dobara i usluga), te alkoholnih pića i duvana. U odjeljku hrane i bezalkoholnih pića cijene su uvećane za 7,5% g/g, dok su u odjeljku restorana i hotela uvećane za 6,1% g/g.

Na početku godine stupila je na snagu Odluka o utvrđivanju specifične i minimalne akcize¹⁹ na cigarete i duvan za 2025. godinu. Pored toga, u februaru je došlo do poskupljenja cigareta od strane pojedinih proizvođača što je uticalo na rast cijena ovih proizvoda. Na taj način u odjeljku alkoholnih pića i duvana cijene su u periodu I-IV 2025. godine uvećane za 4,4% g/g. U periodu I-IV 2025. godine cijene u odjeljku ostalih dobara i usluga su više za 3,1% g/g, te zdravstva 6,6% g/g.

U okviru odjeljka stanovanja, vode, el. energije, plina i drugih energenata cijene u periodu I-IV 2025. godine nisu značajno rasle (0,7% g/g) i na taj način nisu imale bitan doprinos ukupnoj inflaciji u Bosni i Hercegovini.

Uz stabilizaciju cijena sirove nafte na početku godine, u periodu I-IV 2025. godine, u odjeljku prevoza cijene su smanjene (-2,4% g/g). Pored ovog odjeljka, smanjenje nivoa cijena je registrovano u odjeljku odjeće i obuće (-8,8% g/g) te odjeljku namještaja, kućnih uređaja i redovnom održavanju kuće (-0,6% g/g), što je djelimično usporilo rast inflacije u Bosni i Hercegovini.

Pregled indeksa potrošačkih cijena po odjeljcima prema namjeni potrošnje predstavljen je u tabeli ispod.

Tabela 11: Indeks potrošačkih cijena u Bosni i Hercegovini

Odjeljak	I-XII 2024	I 2025	II 2025	III 2025	IV 2025	I-IV 2025
	I-XII 2023	I 2024	II 2024	III 2024	IV 2024	I-IV 2024
00 Ukupan indeks	101,7	103,3	103,5	103,2	103,4	103,4
01 Hrana i bezalkoholna pića	102,1	106,3	107,2	107,8	108,9	107,5
02 Alkoholna pića i duvan	104,2	104,3	105,6	103,9	104,0	104,4
03 Odjeća i obuća	92,5	91,3	91,1	90,8	104,0	91,2
04 Stanovanje, voda, el. energija, plin i dr. energenti	100,1	100,8	100,4	100,6	101,0	100,7
05 Namještaj, kućni uređaji i redovno održavanje kuće	101,2	99,6	100,0	98,9	99,4	99,4
06 Zdravstvo	103,6	107,0	106,8	106,3	106,3	106,6
07 Prevoz	99,2	99,8	99,2	96,9	94,4	97,6
08 Komunikacije	101,3	100,3	100,2	100,2	100,2	100,3
09 Rekreacija i kultura	103,6	103,4	103,4	103,1	103,3	103,3
10 Obrazovanje	101,4	100,5	100,6	100,6	100,6	100,6
11 Restorani i hoteli	107,2	107,1	105,9	105,8	105,8	106,1
12 Ostala dobra i usluge	105,3	103,4	103,3	102,8	102,7	103,1

Izvor: Agencija za statistiku Bosne i Hercegovine

Monetarni sektor

Prema podacima Centralne banke Bosne i Hercegovine (u daljem tekstu CBBiH) ukupna novčana masa (M2) na kraju aprila 2025. godine iznosila je oko 39,5 mlrd. KM i uvećana je za 7,8% u odnosu na isti mjesec prethodne godine. Istovremeno, rezervni novac (M0) iznosio je oko 14,8 mlrd. KM što je za 4,6% više u odnosu na isti mjesec prethodne godine. Prosječna stopa obavezne²⁰ rezerve na kraju aprila 2025. godine nije se mijenjala i iznosila je 10%. Bruto

¹⁹ Upravni odbor Uprave za indirektno oporezivanje donio je Odluku o utvrđivanju specifične i minimalne akcize na cigarete i iznos akcize na duvan za pušenje za 2025. godinu. Minimalna akciza za pakovanje cigareta od 20 komada iznosi 3,58 KM (u 2024. godini je iznosila 3,46 KM), a specifična akciza iznosi 1,65 KM za pakovanje cigareta od 20 komada (ostala je ista u odnosu na 2024. godinu). Akciza na duvan za pušenje utvrđuje se u visini od 80% minimalne akcize na cigarete utvrđene u članu 3. stav (3) ove odluke iznosi 143,20 KM po kilogramu (u 2024. godini je iznosila 138,4 KM po kilogramu). Izvor: Odluka o utvrđivanju specifične i minimalne akcize na cigarete i iznos akcize na duvan za pušenje za 2025. godinu.

²⁰ Prosječna stopa obavezne rezerve = Prosječne obavezne rezerve/osnovica za obračun obavezne rezerve.

devizne rezerve iznosile su oko 17,1 mlrd. KM i veće su za 7,6% u odnosu na isti mjesec prethodne godine.


Bankarski sektor

Prema podacima CBBiH ukupni plasirani krediti na kraju aprila 2025. godine uvećani su za 10,2% u odnosu na isti mjesec prethodne godine i iznosili su 26,8 mlrd. KM. Krediti stanovništvu su uvećani za 10,1% g/g, dok su krediti nefinansijskim preduzećima uvećani za 8,5% g/g. Ukupni depoziti na kraju aprila 2025. godine su uvećani za 7,2% u odnosu na isti mjesec prethodne godine i dostigli su oko 34,2 mlrd. KM. Depoziti stanovništva su uvećani za 8,8% g/g, dok su depoziti nefinansijskih preduzeća uvećani za 7,4% g/g.

Berze u Bosni i Hercegovini

Promet na sarajevskoj berzi (u daljem tekstu SASE) u aprilu 2025. god je uz stopu od 37,9% g/g dostigao 90,6 mil. KM. Ovaj iznos ujedno predstavlja 91,8% ukupnog ostvarenog prometa u Bosni i Hercegovini. U ovom mjesecu na SASE je putem javne ponude obveznica za emitente prikupljeno oko 50 mil. KM i oko 39,5 mil. KM trezorskih zapisa.


Grafikon 8: Promet na SASE u milionima KM



Izvor: SASE

Promet na Banjalučkoj berzi (u daljem tekstu BLSE) u aprilu 2025. godine je dostigao 8,1 mil. KM uz negativnu stopu rasta od 78,1% g/g. Ovaj iznos predstavlja 8,2% ostvarenog prometa u Bosni i Hercegovini u ovom mjesecu. Na BLSE je za emitente održana primarna emisija obveznica u iznosu od 6,5 mil. KM.

Grafikon 9: Promet na BLSE u milionima KM



Izvor: BLSE

Ukupan promet na SASE i BLSE je dostigao 98,7 mil. KM uz negativnu stopu rasta od 3,8% g/g. U ovom mjesecu je putem primarne emisija obveznica i trezorskih zapisa za emitenta prikupljeno 96 mil. KM.


Tabela 12: Ukupna kapitalizacija promet (u KM) na kraju perioda na SASE i BLSE

Godina	SASE	BLSE	UKUPNO
Apr-23	6.193.670.953,5	4.768.505.470,4	10.962.176.423,9
Apr-24	6.329.132.282,1	5.309.281.204,4	11.638.413.486,5
Apr-25	7.929.670.932,9	4.959.401.054,2	12.889.071.987,1

Izvor: SASE i BLSE

Ukupna kapitalizacija na SASE na kraju mjeseca aprila je dostigla 7,9 mlrd. KM uz stopu rasta od 25,3% g/g. Kapitalizacija na BLSE na kraju aprila 2025. godine je dostigla 4,9 mlrd. KM uz negativnu stopu rasta od 6,6% g/g. Ukupna kapitalizacija (SASE+BLSE) na kraju aprila 2025.godine je uz stopu rasta od 10,7% g/g dostigla oko 12,9 mlrd. KM. Odnos kapitalizacije na SASE prema BLSE na kraju ovog perioda je bio 61,5% prema 38,5%.

Grafikon 10: Kapitalizacija na SASE i BLSE u milijardama KM i stopa rasta u %




Izvor: SASE i BLSE

4. Vanjski sektor

Vanjskotrgovinska robna razmjena

U proteklih nekoliko godina Bosna i Hercegovina je bilježila kontinuirani trend rasta vanjskotrgovinske robne razmjene, što se u pojedinim godinama manifestovalo i dvocifrenim stopama rasta izvoza i uvoza roba. Međutim u 2024. godini ovaj pozitivan trend je zaustavljen obzirom da je ukupna vanjskotrgovinska robna razmjena u Bosni i Hercegovini stagnirala. Tako su glavne karakteristike vanjskotrgovinske robne razmjene u 2024. godine bile, stagnacija ukupnog obima razmjene, smanjenje izvoza roba, povećanje uvoza roba i povećanje vanjskotrgovinskog deficita.²¹ Prema trenutno raspoloživim podacima o vanjskotrgovinskoj robnoj razmjeni u Bosni i Hercegovini za 2025. godinu čini se da je došlo do zaustavljanja ovog negativnog trenda. Naime, nakon dugo vremena u Bosni i Hercegovini je došlo do istovremenog rasta izvoza i uvoza roba, što je rezultiralo povećanjem ukupnog obima vanjskotrgovinske robne razmjene u odnosu na isti period prethodne godine. Pregled kretanja vanjskotrgovinskih pokazatelja u Bosni i Hercegovini za period januar-april 2025. godine prikazan je na grafikonu ispod.

Grafikon 11: Vanjskotrgovinska robna razmjena u Bosni i Hercegovini za januar-april 2025. godine (nominalni iznosi i stope rasta g/g)



Izvor: BHAS

Prema trenutno raspoloživim podacima BHAS-a za period januar-april 2025. godine izvoz roba iz Bosne i Hercegovine iznosio je preko 5,6 milijardu KM što predstavlja nominalno povećanje od 282 miliona KM odnosno 5,3% u odnosu na isti period prethodne godine.²² Posmatrano na mjesečnom nivou, izvoz roba iz Bosne i Hercegovine već 7 mjeseci zaredom bilježi pozitivne stope rasta što bi moglo ukazivati da su negativni trendovi iz prethodne godine zaustavljeni. Tako je stopa rasta izvoza roba u aprilu 2025. godine u odnosu na isti mjesec prethodne godine iznosila 1,0%.

Ako se izvoz roba iz Bosne i Hercegovine u periodu januar-april 2025. godine posmatra detaljnije po proizvodima, vidljivo je da su najznačajnija povećanja izvoza roba registrirana u

²¹ Agencija za statistiku Bosne i Hercegovine, Saopštenje, „Vanjskotrgovinska robna razmjena u Bosni i Hercegovini za decembar 2024. godine-prethodni podaci“, 20.01.2025. godine.

²² Agencija za statistiku Bosne i Hercegovine, Saopštenje, „Vanjskotrgovinska robna razmjena u Bosni i Hercegovini za januar-april 2025. godine“, 20.05.2025. godine.

okviru izvoza baznih metala 26,5% (1,8 p.p), el. energije 41% (1,7 p.p), ruda metala gdje je izvoz višesturko uvećan a doprinos rastu ukupnog izvoza iznosio (1,6 p.p), gotovih metalnih proizvoda 6,2% (0,8 p.p), autokomponenti 19,5% (0,8 p.p), prehrambenih proizvoda 12,5% (0,7 p.p) i dr. S druge strane, u periodu januar-april 2025. godine najznačajnija smanjenja su zabilježena u okviru izvoza koksa 68% (-1,4 p.p), mašina i uređaja 7,7% (-0,6 p.p), odjeće 10,7% (-0,5 p.p) i namještaja 6,9% (-0,5 p.p). Ako se izvoz roba iz Bosne i Hercegovine u periodu januar-april 2025. godine posmatra po glavnim trgovinskim partnerima vidljivo je da najviše robe izvezeno na tržište zemalja EU u vrijednosti od skoro 4,2 milijarde KM što predstavlja povećanje od 4,5% u odnosu na isti period prethodne godine. S druge strane, izvoz roba iz Bosne i Hercegovine u zemlje CEFTA-e iznosio je 937 miliona KM što predstavlja povećanja od 10,4%. Ako se robni izvoz iz Bosne i Hercegovine u periodu januar-april 2025. godine posmatra po zemljama vidljivo je da su najznačajnija povećanja zabilježena prilikom izvoza u Hrvatsku 20,4% (3,2 p.p), Srbiju 10,2% (1,0 p.p), Austriju 2,6% (0,2 p.p), dok su najznačajnija smanjenja registrirana prilikom izvoza u Njemačku 4,4% (-0,7 p.p), Italiju 2,3% (-0,2 p.p), dok je izvoz roba u Sloveniju stagnirao sa stopom rasta 0,4%.

S druge strane, uvoz roba u Bosnu i Hercegovinu u periodu januar-april 2025. godine iznosio je preko 9,7 milijardi KM što predstavlja nominalni rast od 444 miliona KM odnosno 4,8% u odnosu na isti period prethodne godine. Posmatrano na mjesečnom nivou, uvoz roba u Bosnu i Hercegovinu u aprilu 2025. godine u poređenju sa istim mjesecom prethodne godine uvećan je za 2,8%. Ovaj nastavak trenda rasta uvoza je veoma značajan u kontekstu kretanja privatne potrošnje i investicija odnosno domaće tražnja u zemlji koja predstavlja glavno uporište ekonomskog rasta u zemlji. Posmatrano po proizvodima, u periodu januar-april 2025. godine najznačajnija povećanja uvoza su registrirana u okviru uvoza električne energije koji je značajno uvećan i doprinosio je povećanju ukupnog uvoza sa (2,4 p.p), zatim baznih metala 12,5% (1,1 p.p), hemijskih proizvoda 3,4% (0,3 p.p), gotovih metalnih proizvoda 6,9% (0,4 p.p), te prehrambenih proizvoda 2,7% (0,3 p.p) i dr. S druge strane, smanjenja su zabilježena prilikom uvoza kamenog uglja 62,4% (-1,3 p.p), rafiniranih naftnih derivata 8,8% (-0,8 p.), tekstila 5,1% (-0,1 p.p) i dr. Ako se uvoz roba u Bosnu i Hercegovinu u periodu januar-april 2025. godine posmatra po glavnim trgovinskim partnerima vidljivo je da najviše robe uvezeno sa tržišta zemalja EU u vrijednosti od skoro 5,7 milijardi KM što predstavlja povećanje od 2,0% u odnosu na isti period prethodne godine. Uvoz roba iz zemalja CEFTA-e iznosio je skoro 1,2 milijardi KM što predstavlja povećanje od 15,6% u odnosu na isti period prethodne godine. Ako se robni uvoz u Bosnu i Hercegovinu u periodu januar-april 2025. godini posmatra po zemljama vidljivo je da su najznačajnija povećanja istog zabilježena prilikom uvoza iz Hrvatske koji je uvećan za 53,8% uz doprinos rastu ukupnog uvoza roba od (3,3 p.p), zatim Kine 21,6% (1,9 p.p), Srbije 15,8% (1,5 p.p), Austrije 5,8% (0,2 p.p). S druge strane, najznačajnija smanjenja uvoza su registrirana prilikom uvoza iz Italije 13,2% (-1,8 p.p), Njemačke 4,1% (-0,5 p.p) i Slovenije 2,4% (-0,1 p.p).

Ovakva kretanja izvoza i uvoza roba u periodu januar-april 2025. godine rezultirala su vanjskotrgovinskim deficitom od preko 4,1 milijardu KM, što predstavlja povećanje od 163 miliona KM odnosno 4,1% u poređenju sa istim periodom prethodne godine. Ako se posmatra struktura robnog deficita u Bosni i Hercegovini može se zaključiti da su rafinirani naftni proizvodi, motorna vozila, farmaceutske preparati i prehrambeni proizvodi najviše doprinosili povećanju deficita. S druge strane, namještaj, metalne konstrukcije i obuća su kategorije u okviru kojih Bosna i Hercegovina ostvaruje suficit. Ukupna pokrivenost uvoza izvozom u Bosni i Hercegovini u periodu januar-april 2025. godine iznosila je 57,6%, pri čemu je pokrivenost sa zemljama EU iznosila 73,8% a sa zemljama CEFTA-e 78,8%. Detaljniji prikaz vanjskotrgovinske robne razmjene u Bosni i Hercegovini u periodu januar-april 2025. godine po HS klasifikaciji prikazan je u tabeli ispod.

Tabela 13: Vanjskotrgovinska robna razmjena u Bosni i Hercegovini u periodu januar-april 2025. godine, HS klasifikacija

Izvoz i uvoz dobara klasifikovanih prema harmonizovanom sistemu kodova (HS)		IZVOZ				UVOZ				DEFICIT				
		Jan-Apr 2024		Jan-Apr 2025		2025/2024 promjena %		Jan-Apr 2024		Jan-Apr 2025		2025/2024 promjena %		Pokrivenost uvoza izvozom
		u mil KM	u mil KM	g/g	p-p	u mil KM	u mil KM	g/g	p-p	u mil KM	u mil KM	g/g	p-p	
	UKUPNO	5323	5605	5.3	5.3	9292	9736	4.8	4.8	-3969	-4131	4.1	4.1	57.6%
1	ŽIVOTINJE I PROIZVODI	72	77	7.1	0.1	319	312	-2.2	-0.1	-248	-235	-4.9	-0.3	24.6%
2	BILJNOG MASTI I ULJA	65	64	-1.5	0.0	388	438	12.9	0.5	-323	-374	15.8	1.3	14.7%
3	ŽIVOTINJSKOG PREHRAMBENE	44	75	70.5	0.6	64	94	46.6	0.3	-20	-19	-4.9	0.0	79.4%
4	PRERAĐEVINE PROIZVODI	168	173	3.0	0.1	836	864	3.3	0.3	-668	-691	3.4	0.6	20.0%
5	MINERALNOG PROIZVODI	445	570	28.0	2.3	1208	1255	3.9	0.5	-763	-685	-10.2	-2.0	45.4%
6	HEMIJSKE PLASTICNE	396	424	7.1	0.5	859	901	4.9	0.5	-463	-477	3.0	0.3	47.1%
7	MASE, GUMA I	264	269	2.0	0.1	599	615	2.7	0.2	-335	-346	3.2	0.3	43.8%
8	KOŽA I KRZNO	27	34	25.6	0.1	82	79	-3.4	0.0	-55	-45	-17.6	-0.2	42.8%
9	DRVO I PROIZVODI OD CELULOZA,	301	294	-2.3	-0.1	137	141	3.1	0.0	164	153	-6.8	0.3	208.2%
10	PAPIR I KARTON TEKSTILI	147	156	5.8	0.2	200	190	-4.7	-0.1	-53	-35	-34.1	-0.5	81.8%
11	TEKSTILNI OBUČA, SESIRI,	288	261	-9.4	-0.5	545	546	0.2	0.0	-257	-285	10.9	0.7	47.8%
12	KAPE I SLIČNI PROIZVODI OD	260	238	-8.5	-0.4	137	151	10.1	0.1	123	87	-29.3	0.9	157.7%
13	KAMENA, GIPSA, BISERI,	77	79	2.2	0.0	178	187	4.8	0.1	-101	-108	6.8	0.2	42.2%
14	PLEMENITI BAZNI METALI I	17	18	2.9	0.0	22	21	-6.8	0.0	-5	-3	-40.0	-0.1	85.4%
15	PROIZVODI OD MASINE,	933	992	6.3	1.1	1163	1289	10.8	1.4	-230	-297	29.1	1.7	77.0%
16	APARATI, TRANSPORTNA	948	945	-0.3	-0.1	1403	1442	2.8	0.4	-455	-497	9.3	1.1	65.5%
17	SREDSTVA I SATOVI, MJERNI,	218	250	14.7	0.6	773	794	2.7	0.2	-555	-544	-2.0	-0.3	31.5%
18	MUZIČKI I ORUŽJE I	43	45	4.9	0.0	132	164	23.9	0.3	-89	-118	33.0	0.7	27.6%
19	MUNICIJA, RAZNI	133	183	37.7	0.9	10	13	26.0	0.0	123	171	38.6	-1.2	1453.2%
20	PROIZVODI UMJETNIČKA	468	459	-1.9	-0.2	228	236	3.6	0.1	240	223	-7.2	0.4	68.7%
21	DJELA.	0	0	0.0	0.0	0	0	0.0	0.0	0	0	0.0	0.0	0.0%
98	NERAZVRSTANO	0	0	0.0	0.0	0	0	0.0	0.0	0	0	0.0	0.0	0.0%

Izvor: BHAS

5. Strana direktna ulaganja

U vrijeme pisanja informacije nisu bili dostupni podaci o stranim direktnim ulaganjima za mjesec januar, februar i mart 2025. godine.

Prema posljednjim dostupnim podacima od strane CBBiH²³ SDU u Bosni i Hercegovini su u 2024. godine dostigla 2.036,8 mil. KM i bila su veća za 8,8% u odnosu na isti period u prošloj godini. Ukupne reinvestirane zarade u 2024. god. su dostigle 1.251,7 mil. KM uz stopu rasta od 24,6 % g/g. Time su sa ostvarenim učešćem od 61,5 % u ukupnim SDU bile veće za 7,8 p.p. u odnosu na isti period u prošloj 2023. godini.

²³ BPM6_for_users_Q1_2015_Q4_2024_stan, neto finansijska pasiva

Tabela 14: Strana direktna ulaganja po kvartalima i ukupno u milionima KM

Godina	K1	K2	K3	K4	K1-K4
2021.	457,4	530,1	373,3	-112,8	1.248,1
2022.	420,6	442,2	396,7	316,0	1.575,4
2023.	499,2	592,9	404,6	375,3	1.872,0
2024.	592,7	394,9	513,9	535,4	2.036,8

Izvor: CBBiH

Dana 2. avgusta 2024. agencije za ocjenu kreditnog rejtinga Standard & Poor's i Moody's Investors Service potvrdile su Bosni i Hercegovini suvereni kreditni rejting „B+ sa stabilnim izgledima“ i „B3 sa stabilnim izgledima“.

Na osnovu člana 17. Zakona o Vijeću ministara Bosne i Hercegovine („Službeni glasnik Bosne i Hercegovine“, br. 30/03, 42/03, 81/06, 94/07 i 24/08), člana 54. stava (1) tačke b) i člana 56. Poslovnika o radu Vijeća ministara Bosne i Hercegovine („Službeni glasnik BiH“, broj 22/03) Vijeće ministara Bosne i Hercegovine na _____. sjednici, održanoj _____ godine, donijelo je

ZAKLJUČAK

1. Vijeće ministara Bosne i Hercegovine usvojilo je ***Informaciju o kretanju makroekonomskih pokazatelja u Bosni i Hercegovini za januar – april 2025. godine.***

broj: _____ od _____. godine.

Broj: _____, _____. godina.
S a r a j e v o

M. P. Predsjedavajuća
Vijeća ministara Bosne i Hercegovine

Borjana Krišto

Na temelju članka 17. Zakona o Vijeću ministara Bosne i Hercegovine („Službeni glasnik Bosne i Hercegovine“, br. 30/03, 42/03, 81/06, 94/07 i 24/08), članka 54. stavka (1) točke b) i članka 56. Poslovnika o radu Vijeća ministara Bosne i Hercegovine („Službeni glasnik BiH“, broj 22/03) Vijeće ministara Bosne i Hercegovine na _____. sjednici, održanoj _____ godine, donijelo je

ZAKLJUČAK

1. Vijeće ministara Bosne i Hercegovine usvojilo je ***Informaciju o kretanju makroekonomskih pokazatelja u Bosni i Hercegovini za siječanj – travanj 2025. godine.***

broj: _____ od _____. godine.

Broj: _____, _____. godina.

S a r a j e v o

M. P.

Predsjedateljica
Vijeća ministara Bosne i Hercegovine

Borjana Krišto

На основу члана 17. Закона о Савјету министара Босне и Херцеговине („Службени гласник Босне и Херцеговине“, бр. 30/03, 42/03, 81/06, 94/07 и 24/08), члана 54. става (1) тачке б) и члана 56. Пословника о раду Савјета министара Босне и Херцеговине („Службени гласник БиХ“, број 22/03) Савјет министара Босне и Херцеговине на _____ сједници, одржаној _____ године, донио је
(број сједнице) (датум сједнице)

ЗАКЉУЧАК

1. Савјет министара Босне и Херцеговине усвојио је *Информацију о кретању макроекономских показатеља у Босни и Херцеговини за јануар – април 2025. године.*
број: _____ од _____ године.

Број: _____, _____ година.
С а р а ј е в о

М. П. Предсједавајућа
Савјета министара Босне и Херцеговине

Борјана Кришто